

Ն.Ս.Օ.Տ.Տ. ԳԱՐԵԳԻՆ Բ
ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՕՐՀՆՈՒԹՅԱՆ ԽՈՍՔԸ
ՀՀ ԲԱՆԱԿԻ ՕՐՎԱ ԱՌԻԹՈՎ

Համայն հայության նվիրական սրբավայր Մայր Աթոռ Սուրբ Էջմիածնից Հայոց Բանակի օրվա առիթով Հայրապետական Մեր օրհնությունն ու շնորհավորանքներն ենք բերում մեր քաջարի բանակի զորավարներին և մարտիկներին:

Փառք և գոհություն Աստծո, որ կազմակերպված և զորեղ է մեր բանակը՝ արթուն պահապանը մեր Հայրենիքի ազատության և մեր ժողովրդի խաղաղ ստեղծարար կյանքի:

Այսօր Մենք աղոթում ենք, որ Հայոց Բանակը առ Հայրենին ջերմ սիրով ու արիության ոգով հավատարմորեն շարունակի հայ զենքի փառքը կերտած մեր պանծալի զորավարների ու անմահ հերոսների ավանդները: Այլև հայցում ենք, որ Ամենակալն Աստված զորակից լինի Հայոց Բանակի արիասիրտ զինվորներին, անվրդով պահի երկնառաք խաղաղությունը հայրենի մեր եզերքներում և Իր Սուրբ Աջի հովանու ներքո պահպանի աշխարհասփյուռ համայն մեր ժողովրդին:

Օրհնությամբ՝

ԳԱՐԵԳԻՆ Բ
ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ս. Էջմիածին,
28 հունվարի 2006 թ.